

**Nukissiornermi ikummatissat akitsuutaat pillugit Inatsisartut inatsisissaattut
siunnersuut**

*Aningaasaqarnermut Nunanilu Avannarlerni Suleqatigiinnermut Naalakkersuisumit
saqqummiunneqartoq*

pillugu

Akilerartarnermut Akitsuusiisarnermullu Ataatsimiititaliap

ILASSUTITUT ISUMALIUTISSIISSUTAA

Siunnersuutip pingajussaaneerpeqarnerani saqqummiunneqartoq

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Niels Thomsen, Demokraatit, siulittaasoq

Inatsisartunut ilaasortaq Kaali Olsen, Inuit Ataqatigiit

Inatsisartunut ilaasortaq Karl Lyberth, Siumut

Inatsisartunut ilaasortaq Aleqa Hammond, Siumut

Siunnersuutip ulloq 28. oktober 2010-mi aappassaaneerpeqarnerani Naalakkersuisut nalunaarutigaat siunnersuummut allannguutissatut siunnersuummik allamik saqqummiusseqqittoqassasoq, taamaattumillu aappassaaneerinerup pingajussaaneerinerullu akornanni siunnersuut Akilerartarnermut Akitsuusiisarnermullu Ataatsimiititaliamut suliarineqartussanngorlugu innersuunneqarpoq.

Allannguutissatut siunnersuutip imarisaa siunertaalu

Umiarsuit timmisartullu nunanut allanut ingerlaartut aamma aalisariutit aalajangersimasumik angissusillit akitsuummik akiliisussaataitanermit ilaatinneqannginnissaat kiisalu suliffeqarfiit aatsitassat pillugit ingerlatallu tamatumunnga pingaarutillit pillugit Inatsisartut inatsisaat naapertorlugu akuersissummik nalunaarfigineqarsimasut akitsuutinik annikillisanik akiliisarnissaat siunnersuutaqqaartup imaraa. Akitsuutip literimut 25 ørinit literimut 10 ørimut appartinneqarneranik imaqartumik Naalakkersuisut aappassaaneerinermit allannguutissatut siunnersuummik saqqummiussipput. Tamatuma kingorna akitsuutinik appaanerup nukissiornermi ikummatissanut tamanut atuutsinneqarnissaa naleqquttutut isigineqarsimavoq.

Siunnersuutip aningaasaqarnikkut kingunerisassai

Allannguutissatut siunnersuutigineqartup kingunerisaannik isertitaqarnerussutissaq 6 mio. kr.-it missaannik annertussuseqartussatut Naalakkersuisut nalilerpaat. Maanna aatsitassarsiornerit aatsitassarsiornermillu ingerlatsinerit aatsitassanik piaalernermik imaluunniit ingerlatat piusut annertuseriarnerannik kinguneqassagalarpata isertitaqarnerussutissatut missingikkat qaffanneqartariassapput. Tamanna malillugu nukissiornermi ikummatissat avatangiisinut akitsuutaat pillugu Inatsisartut inatsisaatigut isertitassat 24 mio. kr-iussasut naatsorsuutigineqarpoq. Tamatumalu saniatigut illoqarfinni erngup nukinganik nukissiorfeqartuni maanna innaallagissamut, imermut kiassarnermullu akeqartitsinerup ilusiligaanerata kingunerisaanik Nukissiorfiit innaallagissamik kiassarneqarnermillu kiffartuutaminnit isertitaqarnerulissapput. Taamatut isertitaqarnerunissaq 2 mio. kr.-it missaannik annertussuseqassasoq ilimagineqarpoq, taakkualu Nukissiorfiit aningaasanut inatsimmi tapiissutisiassaannit ilanngaatigineqassallutik.

Aningaasaqarnermut Ataatsimiititaliap inassuteqaatai**Ataatsimiititaliami amerlanerussuteqartut Inuit Ataqatigiit Demokraatillu allannguutissatut siunnersuutit pillugit ima oqaaseqarumapput:**

Allannguutissatut siunnersuutit aappassaaneerinermi suliarineqartut aqutugalugit akitsuut literimut 25 øremut literimut 10 øremut apparneqarpoq. Tamanna tunngavigalugu nukissiornermi ikummatissanik atuisut tamarmik akitsuummik akiliisussaataitalernerat amerlanerussuteqartunit naapertuuttutut isigineqarpoq. Nunami imaanilu inuussutissarsiutit akiitsumik akiliisussaataatillugit suliffeqarfiit aatsitassarsiornermik ingerlatsisut aammalu aalisariutit anginerit nukissiornermi ikummatissanik atuinerat akitsuutinik akiliisussaataitanermut aamma ilaasariaqarpoq.


Tamanna tunngavigalugu **ataatsimiititaliami amerlanerussuteqartut siuliani taaneqartut** allannguutissatut siunnersuut **akuerineqassasoq** inassutigaat.

Ataatsimiititaliami ikinnerussuteqartut Siumut allannguutissatut siunnersuutit pillugit ima oqaaseqarumapput:

Aappassaaneerinermi ikinnerussuteqarluta oqaaseqaaterput Siumumit innersuussutigaarput. Suli isumaqarpugut siunnersuut inuuniarnikkut atuagarlioreersut minnerunngitsumillu nunaqarfinni isorliunerusunilu innuttaasut annertunerpaamik eqqugaanerannik kinguneqartumik aningaasatigut artukkiissasoq. Kiisalu akitsuutinik qaffaanermut taarsiullugu nukissiuutinik allanik atuinissaq, inuussutissarsiornermik ineriartortitsinissaq allaffissornikkullu sipaaruteqarnissaq annertunerusumik isiginiarneqassasut kissaatigineqarpoq. Taamaattumillu siunnersuummut akerliulluta taasissaagut.

Tamanna tunngavigalugu **ataatsimiititaliami ikinnerussuteqartut siuliani taaneqartut** allannguutissatut siunnersuut **itigartinneqassasoq** inassutigaat.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut pingajussaaniigassanngortippaa.




Niels Thomsen, Siulittaasoq



Kaali Olsen



Aleqa Hammond



Karl Lyberth

